

# 毒劍



武俠小說

陸澹盦

清道咸中北平大俠羅萬藻拳藝雄一時四方豪傑出其門者殆百數而耿七得萬藻傳獨跳梁為猾盜狡險殘忍殺人掠貨財无忌七本懷慶農家子少孤貧鬻為人牧羊主人遇之虐七不能堪盜主人金子身亡去輾轉至北平萬藻故與七父善憫其孤苦留家中使習技擊七固矯健亦便慧得萬藻歡萬藻愛之悉授其技无隱五年藝大成羅門諸弟子無與抗手者萬藻於拳為外家稱少林嫡裔七雖窮其秘意猶未足時萬藻方設鑄局都中往還多奇士有陝人胡鳳鳴者通武當內家術工運氣七潛從之學三年入其堂奧於是七意私自負謂天下无我敵者漸驕縱一旦以事與萬藻忤輒負氣去試從宵人為盜萬藻迺大悔思有以制七戴星若者本胡鳳鳴弟子來從萬藻學其人短小尪瘠望之若猿猱顧懷藝殊精能平地上躍至數丈擊人若鷹隼人莫能測萬藻得之喜盡以授七者授之佗日萬藻病且革顧其子家駒曰我少學藝師嘗切戒我無授匪人為閻閻害我迺不檢誤授耿七悔之无及我死七必橫行若素輕躁藝視七遠遜慎勿與校星若操技與七若而力似不逮然他日能制七者必星若也後此苟有事當與星若商之家駒心易七不然父言也而會星若至自關中入視萬藻萬藻屬之曰我以任俠名燕魯而耿七恃技為姦氓實敗我名七誠橫行子必芟除之則我瞑地下矣星若諾之萬藻卒耿七果為劇盜燕魯案牘積盈寸吏不能捕方是時趙公葆禎撫山左治盜嚴誅土豪惡賊殆盡聞耿七名捕之急七怒夜入趙公室盜翎頂若冠留柬而去詰旦公得柬闔署大譁已而得所失冠於光福寺浮圖之顛浮圖七級矗雲霄四層以上凌圮毀敗皆烏巢蛇窟人莫能登捕役視之相顧咋舌或謂趙公曰耿七負絕藝飄忽若鬼魅捕之不易我聞七本羅萬藻弟子萬藻子家駒承家學亦

負技擊名必能捕七公喜趣使人徵家駒家駒至願爲公捕七自効迺日出物色七一夕直七於途陰尾之七入逆旅家駒佈捕役戶外排闥直入七方踞榻上吸煙見而坦然家駒盛氣斥之七色變遂與家駒搏家駒操利刃健進七持鐵煙管格鬥飛舞莫能近家駒不敵七擊之中要害遂仆七按之地上曰若與我同門胡爲輕身爲捕者俛我以師故不殺若顧若能物色我終爲我害我不若宥也因出短刀剗家駒目家駒痛而暈七遂徜徉去家駒創稍愈兩目盡盲恨七刺骨乃發函遍要諸同門會於撫署越日萬藻諸弟子先後集家駒垂涕述其事衆惡七殘忍皆大忿謀合力攻七未行而戴星若稍後至駭曰師言驗矣諸君匪七敵無妄動衆固知星若能羣推星若星若亦自任而會偵者來言七匿城外某寺中星若率捕者往衆圍攻七七方酣戰星若從空下以利刃連刺七中項及肩七夷然若無覺卒飛躍遁去星若歸歎曰七藝誠精絕欲捕之難矣此事匪胡師來莫能制七奈何於是趙公及衆趣星若要胡鳳鳴鳳鳴時年七十餘出家爲黃冠隱魯之勞山星若跡得之白其事鳳鳴以方外辭堅不肯行會家駒亦踵至伏地固請叩頭流血鳳鳴見家駒盲心亦惻然乃出一短劍付星若劍長尺餘柄有篆銘甚古晶瑩奪目因屬星若曰此劍極鋒利鋼鐵遇之皆寸斷割犀鞞如腐革寶物也七恃運氣術刃不能傷若以此劍擊刺創之必矣劍尖有毒汁中人見血則立死我懷此劍三十年未嘗一用七誠凶殘殺以毒劍亦得其當矣星若受命懷劍歸時七已去至萊州星若率衆踵往聞七方嫗一士倡伏匿其家星若請於趙公馳檄萊州守發兵乘夜圍倡家士卒譟而呼破門直入七方擁仙臥聞警驚起跣足服單袴飛躍登梁上欲破屋遁去星若預率諸同門伏於屋上遲七出籓起要擊利刃紛下七徒手與衆搏勇不可當人莫能近門正酣星若揚臂呼衆忽散去七愕然欲逸星若忽持毒劍起從空躍下以劍刺七胸七格以臂劍鋒割臂創寸許血出作紫色七大吼僵仆屋上視之頃刻絕矣七既死被其害者皆額手慶趙公喜重賞星若星若辭曰我此來爲除閭閻害忍殺同門以博厚賞耶卒不受趙公歎息乃厚卹家駒毒劍藏星若家洪楊之亂星若與胡公林翼善往佐其軍岳州之役星若歿於陣毒劍遂不知所往